



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

არტისტული საზოგადოება

არტისტული საზოგადოება, თბილისის არტისტული საზოგადოება, დაარსდა 1888 მეცენატ-კომერსანტის ისაი ფითოვეის საოჯახო თეატრის ბაზაზე (მდებარეობდა ახლანდ. მ. ლერმონტოვისა და გ. ქიქოძის ქუჩების კუთხეში), სადაც მოყვარულები რუს. დრამ. და საოპერო ნაწარმოებებს ასრულებდნენ. ა. ს-მ შემდგომში ხელი შეუწყო თბილ. პროფ. რუს. თეატრის განვითარებას. საზ-ბის პირველი მამასახლისები იყვნენ ი. ფითოვეი, მ. იპოლიტოვ-ივანოვი, პ. ოპოჩინინი. საზ-ბას ჰყავდა საოპერო, საოპერეტო და დრამ. დასები, აგრეთვე საკუთარი სიმფ. ორკესტრი, რ-იც თბილ. მუს. სასწავლებლის მოსწავლეების მუსიკოს-მოყვარულებისაგან შედგებოდა (დირიჟორები: მ. იპოლიტოვ-ივანოვი, ი. ტუფი, გ. ყორღანოვი).

ა. ს. სახაზინო თეატრთან ერთად ხელოვნ. საუკეთესო ნიმუშების პროპაგანდას ეწეოდა. მას არ გააჩნდა საკუთარი შენობა, ი. ფითოვემა მხოლოდ 1901 დაამთავრა ა. ს-ის თეატრის მშენებლობა (ახლანდ. შოთა რუსთაველის სახ. თეატრის შენობა). 1901 წ. 8 თებ. აქ რუს. თეატრმა გახსნა სეზონი სპექტაკლით ა. გრიბოედოვის „ვაი ჭკუისაგან“, თეატრში XX ს. 10-იან წლებამდე ხელშეკრულებით და მონვევით ჩამოდიოდნენ მსახიობები მ. სავინა, პ. სტრეპეტოვა, ი. იაბლოჩკინა, ვ. კომისარჟევსკაია, მ. პეტიპა, ნ. ორლოვი, ა. ლენსკი.

პირველი მსოფლიო ომის (1914-18) წლებში რუს. თეატრის მდგომარეობა არ იყო სახარბიელო. 1915 დაიწყო რეორგანიზაცია - რუს. დასის ძლიერი შემადგენლობა დაუკავშირდა რუსეთის თეატრ. საზ-ბის მსახიობების ამხანაგობას - „ტარტოს“ (Товарищество Артистов Российского Театрального Общества). თეატრს რეჟ. ა. ტუგანოვი ხელმძღვანელობდა, დასში შედიოდნენ: ე. სატინა, მ. როქსანოვა, ბ. კოშევა, ე. ჟიხარევა, მ. მრავინა, ვ. ტორსკი, მ. რუბაევი, ე. ლიუბიმოვ-ლანსკოი და სხვ. ამავე დასში

მუშაობდნენ ქართ. თეატრის მსახიობები: გ. დავითაშვილი, გ. სარჩიმელიძე, ე. დონაური. საბ-ბის თეატრში რეჟ. ა. წუნუნავა წლების მანძილზე დგამდა სპექტაკლებს.

ა. ს-ის თეატრმა 1920-მდე იარსება. 1920-21 სეზონიდან შენობაში დამკვიდრდა თბილ. ქართ. დრამ. თეატრი, რ-საც 1921 წ. 25 ნოემბრიდან შოთა რუსთაველის სახელი მიენიჭა.

ნ. შვანგირაძე
